



[www.bng-ribeira.org](http://www.bng-ribeira.org)

**Luíís Pérez Barral, concelleiro do Bloque Nacionalista Galego (BNG) presenta a seguinte**

## **MOCIÓN RELATIVA Á PROTECCIÓN DE ANIMAIS E PARA DECLARAR ESTE CONCELLO LIBRE DE CIRCOS CON ANIMAIS**

### **EXPOSICIÓN DE MOTIVOS**

A cuestión do respecto cara aos animais levou a cidadanía a demandar novas accións en diferentes eidos normativos. O uso de animais en espectáculos é, quizais, un dos aspectos máis surrealistas que teñen lugar no noso país, nomeadamente os circos, que ofrecen unha imaxe radicalmente distorsionada do que supón a fauna silvestre.

A vida destes animais nos circos caracterízase polo illamento, o castigo, o medo e o cativerio. As exhibicións de animais nos circos ofrecen tamén unha mensaxe educativa negativa. Aínda que os espectáculos circenses non amosen condutas de violencia explícita á vista do público espectador, os actos que os animais teñen que realizar durante toda a súa vida non son habituais nin naturais e, para obrígalos a se comportaren deste xeito, sométenos a métodos de adestramento baseados no castigo físico, a privación de alimento e ao illamento do resto dos seus conxéneres.

**Os animais que viven nos circos están obrigados a permaneceren o resto da súa vida privados de liberdade**, atados, engaiolados ou encadeados en camións de traslado, negando calquera posibilidade de satisfacción das súas necesidades etolóxicas e naturais. A natureza transitoria dos circos e a vida constante de confinamento, privación de estimulación e frustración da fauna, conduce os animais a estados neuróticos e comportamentos repetitivos “estereotipados”, como balancear a cabeza ou corpo, movementos circulares dentro das gaiolas e até automutilacións.

Estes trastornos psicolóxicos chegan a provocar reaccións violentas que poden causar graves riscos para as persoas en caso de accidente, un extremo que sucedeu en numerosas ocasións ao longo dos últimos anos.

**Un importante número de países e vilas de todo o mundo xa vetaron o uso de animais nos circos** con base na súa protección e benestar, ao considerar que a súa exhibición e as condicións de vida supoñen unha crueldade, ao mesmo tempo que incrementan o tráfico ilegal de animais e a caza furtiva de especies protexidas.

Os circos usan os animais como reclamo do público infantil. Xulgamos que os pequenos e as pequenas deste país, a sociedade do futuro, merecen unha educación baseada en valores que inclúan o respecto cara aos seres vivos e o contorno.

**Por todo o anteriormente exposto propoñemos:**

- 1. Que este concello non autorice nin promova ou ampare a instalación de circos con animais no termo municipal.**
- 2. Declarar este concello vila libre de circos con animais.**
- 3. Que este concello non permita a instalación de publicidade de espectáculos circenses con animais no termo municipal.**
- 4. Notificar este acordo á Xunta de Galiza, aos grupos do Parlamento de Galiza e á Asociación Animalista Libera.**
- 5. Que o Concello de Ribeira promova a adopción de animais da canceira no canto de mercalos.**
- 6. Que realice accións encamiñadas a evitar o abandono de animais domésticos e castigue a aquelas persoas que maltraten e/ou abandonen os seus animais.**

Ribeira, febreiro do 2014

Asdo: Luís Pérez Barral